

<b>Zeitschrift:</b>	Igl Ischi : organ della Romania (Societat de Students Romontschs)
<b>Herausgeber:</b>	Romania (Societat de Students Romontschs)
<b>Band:</b>	24 (1934)
<b>Artikel:</b>	La populaziun romontscha el Grischun tenor la dumbraziun federala de 1930
<b>Autor:</b>	Tuor, P.
<b>DOI:</b>	<a href="https://doi.org/10.5169/seals-882298">https://doi.org/10.5169/seals-882298</a>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

**La populaziun romontscha  
el Grischun tenor la dumbraziun federala  
de 1930**

da Prof. P. Tuor

---

Tuts Romontschs e cun els ils amitgs de nossa viarva ordeifer nossas vals han spetgau cun interess e malpazienzia ils resultats, che la dumbraziun dil pievel svizzer dils 1930 vegni a purtar ariguard carschen u digren de nies lungatg enteifer il decenni 1920 a 1930. Daferton ch'il diember de quels, che ein sedeclarai el cantun Grischun per Romontschs fuva tschessaus ad in tschessar tiellas dumbraziuns anteriuras: da 37 794 els anno 1880 a 37 036 gl' onn 1888 e sin mo 36 472 gl' onn 1900, ha ei tutenina giudau in retegn, gie ina compleina viulta ellas dumbraziuns suandontas. Igl onn 1910 ei il diember dils Romontschs el Grischun puspei sesalzaus sin 37 662 e 1920 sin 39 029. Visavi ad ina sminuziun de 1322 olmas els dus decennis da 1880 a 1900 steva aschia in carschen de 2 557 els vegn onns suandonts, da 1900 a 1920.

E quei che pareva de muntar aunc dapli, la populaziun romontscha fuva denter las duas dum-

braziuns de 1910 e 1920 buca mo carschida en ceſra absoluta, mobein era en proporziun cun la populaziun totala dil cantun. Igl onn 1910 vegneva ei sin 1000 habitants dil Grischun 322 Romontschs, igl onn 1920 perencunter 326. Sco jeu hai explicau da siu temps en in' autra lavur, havein nus d' engraziar quei migliurament spirontamein all' emigraziun de luvrers talians, caschunada entras l' uiara e la crisis che ha suandau quella. La populaziun tudestga fuva era duront quei temps progressada en proporziun pli ferma che la romontscha. 1910 aunc buca dil tut la mesadad dil pievel dil Grischun han nos convischins de lungatg tudestg pegliau entochen 1920 il surpli. Da 49% ein els carschi sin 51%. Nies cantun ei aschia en quella perioda daventaus ina tiara cun majoritad tudestga, suenter ch' ils Romontschs han giu predominau naven da sia fundaziun entochen miez il schenivavel tschen-taner e ch' els surpassavan era daleudenvi ensemble cun ils avdnts de lungatg talian la populaziun tudestga.

Suenter la viulta per part silmeins favoreivla al mantegn de nossa viarva, sco ella fuva semussada tier las dumbraziuns de 1910 e 1920, interessava, gie preoccupava ils patriots romontschs grondamein la damonda, tgei ch' igl avegnir porti, schebein nies lungatg possi s'enfermir aunc dapli ni silmeins sedustar sil tschespet occupau, ni sche la veglia nauscha malsogna, il continuau trer ana-

vos, dil qual el pitescha da tschentaners enneu, prendi suenter pintga pausa puspei il surmaun. Ei deva motivs de temer e motivs de sperar.

*Motivs de temer.* La dumbraziun de 1920, che ha purtau al Romontsch il pli grond progress, haveva giu liug en in temps extraordinari, alla fin della gronda uiara, duront che la crisis per l' industria d' hotels era aunc buca tschessada. Mellis jasters havevan bandunau il cantun e biars Grischuns, specialmein era Romontschs, eran returnai ella patria. Aschia seschava l' augmentaziun digl element romontsch s' explicar senza breigia. Ils temps ein da 1920 enneu plaunsiu semidai, silmeins per part. Ils hotels han recuvrau in ton de lur clientela, ils jasters han danovamein entschiet ad imigrar en nies cantun, ed enqualin dils nos han era puspei anflau la via suls confins. La dumbraziun digl 1 de december 1930 ei curdada en in temps d' in risvegl della veta economica, d' ina relativa prosperitad. La nauscha crisis, che stermenta dapresent puspei nossa tiara e biaras autras, era aunc buca rutta ora. Senz' auter fuva ei pia de preveder ina certa augmentazion della populaziun nunromontscha el cantun, cunzun els loghens de cura ed industria, ed ei fuva de temer ina sminuziun, silmeins fleivla, dils avdonts romontschs, cunzun en vitgs pli isolai. Ei vegneva aunc leutier, che gia la dumbraziun de 1920, schi favoreivla ch' ella ei schiglioc stada als Romontschs, haveva manifestau in diember de posiziuns pli

fleivlas, surtut en Sutselva e Tumliasca, e ch' ei duvrava cheu pauc per surventscher la resistenza romontscha.

Sper quels motivs de temer deva ei denton per ventira era *motivs de sperar*. Il moviment nazional romontsch, svegliaus avon decennis entras nossas pli veglias uniuns: La Societad reto-romontscha, la Romania e l' Uniun dils Grischs, ed entras ils menaders e campiuns de nossa caussa: Gion Antoni Bühler, Giachen Hasper Muoth, Zaccaria Pallioppi, Caspar Decurtins ed auters aveva retschiert in niev impuls cun la fundaziun della Ligia Romontscha, il sustegn finanzial e moral purschius dal Cantun e dalla Confederaziun, la creaziun de novas societads, cunzun ellas contradas pli periclitadas: la Renania, l' Uniun dil Plaun, l' Uniun de Surmir, la Sesana e la Ladinia. Tut quei grond idealismus, quella breigia e premura, stueva, aschia fuva ei de crer, era haver ina certa influenza sil status linguistic dil pievel grischun, retener l'invasiun tudestga, encuraschar ils nativs romontschs de sedeclarar senza turpetg, anzi cun plascher e luschezia, sco appartenents al pli vegl e venerabel lungatg dil cantun, ed aschia era seschar inscriver sco Romontschs ellas gliestas de dumbraziun de 1930. E plinavon savevan ins constatar cun satisfacziun, ch' il diember dellas naschientschas sesminueva per nuot ni mo per pauc ellas vischnauncas romontschas, cunzun della part catolica, daferton ch' ei dat

els centrums de nossa Svizzera e bein era en enqual contrada agricola bunamein tontas fossas sco tginas.

Aschia eis ei de capir, che ils Romontschs ed ils amitgs de nies lungatg, danunder ch' ei seigien, fuvan grondamein spanegiai sils resultats, che la dumbraziun de 1930 vegni a revelar ari-guard il stan numeric della populaziun romontscha el Grischun. Suenter che las cefras definitivas ein vegnidas publicadas dagl Uffeci statistic federal a Bern alla fin della stad 1934 eis ei pusseivel de serender exactamein quen, tgei progress u tgei regress il pievel romontsch ha fatg ella perioda decennala de 1920 a 1930 e trer la ballontscha e concluder, schebein el seigt schessaus ni semantenius. Per quei intent fuss ei buca sufficient ded allegar las cefras, che se-refereschan sil cantun entir, forsa era buca de semplamein renviar sillas tabellas statisticas tschentadas alla fin de questa laver, ord las qualas ils resultats dellas singulas vischnauncas selain eruir. Nus stuein biaronz era entrar els detagls, examinar, pesar e comparegiliar ils resultats de tut las differentas divisiuns politicas e territorialas dil Grischun: districts, cumins e vischnauncas, regiuns e valladas.

### **1. Ils resultats dil cantun.**

Prendeien igl emprem il cantun sco tal. Cheu savein nus constatar che la populaziun romon-

tscha ei el decenni 1920 a 1930 semantenida ualti exactamein silla medema cefra absoluta: ina differenza, e zuar ina perdita ded ina suletta olma. 39 029 igl onn 1920 e 39 028 igl onn 1930. Sch'ei continuass ad ir en giu el medem tempo, vegness il Romontsch aunc adina a viver tschentaners e tschentaners.

Mo nus astgein buca selegrar memia baul de quei resultat, il qual para ded esser meins disfatoreivels, che quei ch' ei fuva de temer. Ord dus motivs ei la situaziun dil Romontsch meins favoreivla, che quei che las cefras allegadas fan veser ora. Primo ein quellas sezzas buca gestas ed exactas, sunder sebaseschan sin in sbagl della statistica. Secundo ei la sminuziun bia pli considereivla, sche nus compareglein ella cul carschen della populaziun dil Grischun enteifer la medema perioda, sche nus quintein la perdita buca totala, mo proporzionala, ch' ils Romontschs han pitiu ils davos diesch onns.

La statistica, perfin l' officiala, schiglioc ina scienzia aschi exacta, sa era commetter errurs. Las maschinas de quintar, cullas qualas ella ope-rescha, san fallir la rubrica, la lingia ni colonna, ella quala ina cefra duei vegrir purtada. Aschia era ei daventau culla dumbrazion federala de 1920. El rapport official sur quella figurescha la vischnaunca de Schnaus cun buc in sulet Romontsch, encuntercomi cun 98 Taliens! Quei ei in sbagl evident. Ei dueva star 98 Romontschs

e buc in Talian. Curregin nus quell' errur, s' augmentescha il diember dils Romontschs tier la dum-braziun de 1920 per ual quels 98 e comporta a-schia enstagl de 39 029 ina cefra de 39 127. La perdita denter 1930 e 1920 ei per ual ton pli gronda e munta sin 99 olmas. Quei fuss ina pintga vischnaunca pli che avunda per ina popula-zion, la quala ei schiglioc gia aschi pauc nume-rusa.<sup>1)</sup>

La caussa stat aunc mender, sche nus con-siderein, che la populaziun totala dil cantun ei duront quei decenni carschida de 119 854 sin 126 340, pia per 6 486. Quella augmentaziun croda entiramein en favur dils habitants de lungatg tu-destg, che de 61 379 ein arrivai sin 67 859. La con-sequenza ei naturalmein, che ils Romontschs (ed era ils Taliens) ein sesminui per in bienton en propor-zion culla populaziun totala e culs habitants tu-destgs. Gl' onn 1920 vegneva ei sin 1000 habi-tants dil cantun 326, igl onn 1930 mo pli 309 Romontschs. Igli onn 1888 fuva ei aunc 391; en 42 onns ina sminuziun proporzionala dils Ro-montschs per ina tschunavla part, quei daferton che lur cefra totala ei en quei termin perfin car-schida per 2 556. Nus essan pia propri buc i ana-vos, mo nus havein buca saviu tener pass culla augmentaziun dil rest della populaziun dil cantun.

---

<sup>1)</sup> En sesez eis ei era pusseivel, ch' il sbagl fuss ar-rivaus a Schnaus e buca pér els biros de Bern. Nus ha-vein en questa lavur curregiu consequentamein tala errur.

E quei ei buca de sesmarvegliar. Taliens e Tudestgs retscheivan onn per onn succuors entras l' imigraziun ord auters cantuns e tiaras jastras, daferton che ils Romontschs san s' augmentar bunamein mo entras il surpli dellas naschientschas suls mortoris. Ins pertratgi: igl onn 1888 deva ei el Grischun 14 054 burgheis d' auters cantuns ed jasters, 1930 fuva ei 36 760, pia in' augmentaziun de 22 706. Da quella ha la populaziun tudestga e taliana el Grischun giu la gronda part, mo zunftga ils Romontschs. La sminuziun de quels ei perquei era bia pli zunftga, sch' ins confrunta ella culla populaziun grischuna dil cantun enstagl cun la populaziun totala. 1887 vegneva ei sin 1000 burgheis grischuns 447 Romontschs, 1930 aunc adina 436, pia ina sminuziun de mo 2 %, daferton ch' ella munta ella medema perioda bunamein sin 20 % en risguard culla populaziun totala.

## 2. Enteifer il territori romontsch.

Sco jeu hai gia explicau en ina lavur de pli baul, scretta sur la dumbraziun federala de 1920, astgein nus buca prender en égl igl entir cantun, mobein sulettamein las contradas romontschas, vulend constatar, schebein il Romontsch seigi en digren ni buc. Nus Romontschs havein neginas miras de conquista territoriala, nus havein buca la pretensiun de s' extender sur il territori ora, che nus occupein actualmein, de gudignar tschespert en districts, cumins u vitgs tudestgs u ta-

lians. Nus savein esser cuntents de salvar il nies. Aschifetg che nus selegrein della fideivladad ed attaschadada che nos convischins emigrai demuossan al lungatg mumma, per il manteniment dil Romontsch ha ei pauc de dir, schebein nus essan s' augmentai ni sesminui en contradas d'auter lungatg, seigi el Grischun ni ell' ulteriura Svizzera. Tut dependa mo de quei, che nus semantenien intactamein sil sulom gia restretgs pli che avunda, nua che nus essan de casa. Per saver, co ei stetti propri cul Romontsch, stuein nus perquei far abstracziun della aschinumnada «diaspora», dils loghens nua che Romontschs vivan spatischai denter conburgheis de lungatg tudestg ni auter, nus astgein considerar mo il territori romontsch.

Ed ei dat en nies Grischun in territori, enteifer il qual il Romontsch predominescha pli u meins da tschentaners enneu. El va dal Badus, Lucmagn, Terri, las vals dil Rein anterius e ses confluents viagiu entochen las tumas de Domat, da leu il Rein posterius viasi entochen las ruinas della Roffna e tras las vals dell' Albula e dil Gelgia sur las tschemas dellas alps viaden en l' Engiadina e Mustair entochen sil Maloia ed ils confins austriacs e talians. Quei territori compeglia ils districts dil Rein anterius, Glogn, Plaun, Muntogna (deno il cumin de Stussavgia), Albula, En, Mustair e plinavon aunc ils cumins u cirquits de Schons ed Engadin' aulta. Igl ei buc in territori

romontsch completamein serraу, el cuntegn era in diember vischnauncas tudestgas u mischedadas de lungatg, vischnauncas tudestgas da vegl enneu sco Sursaissa, Val, Valendau, Versomi, Tumein, Mutten, Ferrera etc., e vischnauncas tudestgadas pér el temps pli novissim sco Samnaum, Bonaduz e pliras els cumins de Tumliasca e Tusaun.

En quei territori viveva 1930 ina populaziun totala de 58 900 e de quella ein 36 015 sequintai per Romontschs e 18 978 per Tudestgs. La dumbraziun de 1920 haveva resultau: 55 314 habitants: 35 913 Romontschs e 16 290 Tudestgs. En quei territori ei pia era il diember dils Romontschs carschius enteifer ils diesch onns, schegie mo per la cefra modesta de 102 olmas. Ils Tudestgs per-encunter han giu in' augmentaziun de buca meins che 2 685. Bia mender stat ei perquei, sche nus prendein las cefras proporzionalas. Sin 1000 olmas vegnev' ei igl onn 1920 Romontschs 649 e Tudestgs 294, igl onn 1930 Romontschs 611 e Tudestgs 322. Nunditgond ch' il diember absolut dils Romontschs ei, cuntrariamein a quei che nus havein viu per il cantun entir, carschius per em-pau el territori romontsch, sche seresultescha ei per els in' untgida en cefra relativa, proporzionala, aunc pli gronda per quella part della tiara, che per il cantun sez. La sminuziun proporzionala dils Romontschs comporta per il cantun 52 e per il territori romontsch 58 per melli. Cheu-

encunter sa ei consolar nus mo pauc, sche nus considerein, che nus stevan tier la dumbraziun de 1910 buca bia meglier che dapresent, essend ch' ei vegneva lu el territori indicau sin 1000 habitants era mo 626 Romontschs. Quei confirma-scha mo, che la dumbraziun de 1920 haveva per ils motivs transitorics, che nus havein viu plinensi, dau al Romontsch in resultat excepzionalmein favoreivel, il qual el ha buca saviu mantener sil-suenter. Ha gie era ellas contradas romontschas, suenter la pausa dell'uiara, l'imigraziun de Svizzers nungrischuns e ded jasters repriu els davos diesch onns. Enteifer quei territori havein nus ina augmentaziun de 3595 ołmas e de quei crodan 2242 sin la populaziun buca grischuna e mo 1353 sils burgheis dil cantun. Ed en quella davosa cefra ei aunc compriu il diember dils Grischuns se-tratgs neutier ellas vals romontschas ord las con-tradas tudestgas e talianas dil cantun.

### 3. Las differentas regiuns.

La dumbraziun de 1930 scuviera pia ina sche-gie buca gronda untgida dil lungatg romontsch duront ils diesch onns precedents ton el cantun Grischun sco era enteifer il territori, nua ch' el vegrn principalmein plidaus. Cheu encunter sa il factum ch' el ha gudignau cerca 100 olmas en quei territori buca vegrn allegaus, essend che il tudestg ei era leu s' augmentaus en ina propor-zion bia pli gronda. Per saver stabilir, a tgei ra-

schuns che tala digren ha de vegrir attribuida e tgei aspects seporschan per igl avegrir, eis ei necessari ded examinar ils resultats dellas differentas contradas u regiuns, ellas qualas il territori romontsch sa vegrir dividius. Conformamein alla posiziun geografica ed alla forma dil dialect savein nus distinguere las quater regiuns suandontas: 1. *La Surselva* ni il Rein anterius (ils cumins della Cadi, Lumnezia, Foppa, de Rueun e Trin), 2. *la Sutselva* ni il Rein posterius (ils cumins de Razen, Tumliasca, Tusaun e Schons), 3. *il Surmir* ni l' Albula (ils cumins d' Alvaschein, Belfort, Surses e Bergugn), 4. *l' Engiadina* ni la val digl En, tier la quala nus tergein era la val Mustair.

Dubi pon ins haver ariguard ils cumins de *Trin* e *Bergugn*. Igli emprem enclina en dialect e posiziun geografica zun fetg viers la Sutselva, daferton che Bergugn, schegie separaus dall' Engiadina tras la cadeina dellas alps, ei parentaus cun lezza ariguard plaid e confessiu.

La suandonta tabella illustrescha il moviment della populaziun totala e romontscha duront il davos decenni:

	1920	1930
--	------	------

	<i>Populaziun</i>		<i>Populaziun</i>	
	<i>totala</i>	<i>romontscha</i>	<i>totala</i>	<i>romontscha</i>
Surselva (cun Trin)	21 563	16 292	22 092	16 601
Sutselva	10 919	5 287	11 088	4 952
Surmir (cun Bergugn)	6 532	4 668	6 992	4 694
Engiadina (cun Mustair)	16 300	9 666	18 728	9 768
	<hr/> 55 314	<hr/> 35 913	<hr/> 58 900	<hr/> 36 015

Ord quella tabella suondan ils suandonts resultats ariguard la populaziun romontscha:

	<i>Carschen</i>	<i>Digren</i>
Surselva	309	—
Sutselva		335
Surmir	26	
Engiadina	102	
	437	335

Augmentaziun totala: 102. La populaziun romontscha ei en Surselva e Surmir ensemens ual carschida per ton, sco ella ei sesminuida en Sutselva. L' augmentaziun en Engiadina corrispunda aschia exactamein all' augmentaziun totala.

Quintein nus la proporziun, ella quala ils Romontschs stattan cun la populaziun totala de quei territori, sche obtenin nus:

*Romontschs sin 1000 habitants*

	1920	1930	<i>Digren</i>
Surselva	755	751	4
Sutselva	484	447	37
Surmir	714	673	41
Engiadina	593	521	72

Nus constatein, che la Surselva ei semantennida, daferton che las treis otras regiuns ein idas pli u meins anavos, il pli fetg l' Engiadina.

La Surselva sepresenta aunc pli vengonzamein, sche nus prendein ella mo tochen tier il vegl confin historic: igl uaul de Flem, scludend

il cumin de Trin. 1920 haveva quei territori 18 658 habitants, de quels 15 047 Romontschs, 1930 fuva ei 19 110 habitants, de quels 15 408 Romontschs. La populaziun ei carschida en quei decenni per 452 olmas, sillas qualas ei croda 361 sin nies lungatg. La proporziun, 806 Romontschs sin 1000 habitants, ei semantenida nunvariada. La Surselva semuossa aunc adina sco cittadella nunballuccinta dil pievel romontsch.

Sco nus havein gia explicau pliras gadas, haveva la dumbraziun digl onn 1920 per certi motivs — uiara, crisis — giu in resultat extraordinariamein favoreivel per la populaziun romontscha. Sche nus mein diesch onns plinensi e comparegliein las cefras della dumbraziun de 1930 cun quellas de 1910, sche croda il quen per la Surselva perfin en favur, per l' Engiadina mo zun pauc en disfavur de nies lungatg.

Sin 1000 habitants deva ei Romontschs:

	1910	1920	1930
en Surselva	743	755	751
Engiadina	528	593	521

En Sutselva e Surmir encuntercomi ei la sbassada dil diember dils Romontschs era en ris-guard agl onn 1910 ina continuada. Las cefras corrispondentas ein:

	1910	1920	1930
Sutselva	496	484	447
Surmir (compriu Bergugn)	740	714	673
Surmir (senza Bergugn)	818	786	737

#### 4. Ils resultats de cumins e vischnauncas.

Pli bia glisch sur il moviment della populaziun romontscha, suls motivs de ses progress e regress retscheiva ins examinond ils resultats dils differents cumins e de zacontas vischnauncas cun caracter pli tipic en quei risguard.

a) *La Surselva.* Ses tschun cumins semuosan sco suonda:

Cumins	1920		1930	
	Populaziun totala	romontscha	Populaziun totala	romontscha
Cadi	7 093	6 738	7 369	7 037
Foppa	5 707	4 007	5 778	4 020
Rueun	2 130	1 509	2 207	1 591
Lumnezia	3 728	2 793	3 756	2 760
Trin	2 905	1 245	2 982	1 193
	21 563	16 292	22 092	16 601

Quels resultats reveleschan las suandontas midadas denter 1920 e 1930:

Cumins	Populaziun totala		romontscha	
	Carschen	Digren	Carschen	Digren
Cadi	276	—	299	—
Foppa	71	—	13	—
Rueun	77	—	82	—
Lumnezia	28	—	—	33
Trin	77	—	—	52
	529	—	394	85

Las midadas, che nus constatein, ein per tuts ils cumins de pintga muntada, e quei ariguard ton della populaziun totala, sco della romontscha.

Tut stat presapauc sin pei vegl. Denton eis ei aunc adina de remarcar, che en dus cumins, la Cadi e Rueun, ei la populaziun romontscha carschida, ferton che la totala ei sesminuida (e quei era per ils Tudestgs; Cadi 1920: 298, 1930: 272, Rueun 1920: 605, 1930: 601). In post passiv pli malemperneivel dat mo il cumin de Trin, ord ils motivs, ch' ein de descriver plinengiu.

Ord las cefras indicadas en la tabella sisura seresultescha il suandont quen proporzional. Sin 1000 habitonts fuvan Romontschs:

<i>Cumins</i>	<i>1920</i>	<i>1930</i>	<i>Carschen</i>	<i>Digren</i>
Cadi	950	955	5	
Foppa	702	696		6
Rueun	708	721	13	
Lumnezia	749	735		14
Trin	428	400		28

La Cadi, schegie situada ella part extrema u periferica della tiara (ni plitost ual perquei) ei e resta il centrum nundispoteivel, il rampar nun balluccont dil pievel romontsch. Quei vesein nus aunc meglier, sche nus tergein aunc tier il resultat della dumbraziun de 1910. Il Romontsch sesanfla en continuada lingia ascendenta, el representa 92 % della populaziun dil cumin egl onn 1910, 95 % egl onn 1920 e 95½ egl onn 1930. In semegliant maletg porscha il cumin il pli demaneivel della Cadi, quel de Rueun: 63 % Romontschs 1910, 71 % igl onn 1920 e 72 % tier la davosa dumbraziun. Da Glion ensi ei pia la

posiziun dil Romontsch s' enfirmida els davos 20 onns, duront ch' ella ei restada quasi sil medem pei ella Foppa e Lumnezia. Meins buna figura fa il cumin de Trin, 1910: 48 %, 1920 cerca 43 % e 1930 mo pli 40 % Romontschs. Sch' ei continuescha aschia, veggan quels a curdar en paucs decennis della mesedad sin ina tiarza della populaziun.

Il plaz, che stat a disposiziun per questa lavur tonscha buca per appreziar pli exactamein ils resultats era dellas singulas vischnauncas. Mo zacontas de quellas san vegin risguardadas, ual talas, che han ina significaziun tipica en quei che risguarda il manteniment dil Romontsch.

Ella *Cadi* anflein nus dus pigns centrums de germanisaziun: a *Mustér* sia claustra e scola claustrala, a *Trun* sia fabrica ed autra industria. Perquei dat ei era a *Mustér* 144 ed a *Trun* 66 Tudestgs. En omisdus loghens denton han ils Tudestgs sa-viu far u negin ni mo pign progress. Las cefras corrispudentas ella dumbraziun de 1920 fuvan 136 e 76. Era a *Breil*, *Sumvitg* e *Tujetsch* ein ils Tudestgs i anavos ed ils Romontschs anavon.

Ella *Foppa* porscha il resultat de *Glion* special interess. Igl ei leu oravontut la claustra de muniessas cun siu flurent institut de giuvnas, che trai egl emprem marcau spel Rein elements tudestgs. Buca per nuot anflein nus a *Glion* ina predominanza della schlattaina feminina, sco forsa en negin auter liug en Svizzera. 886 persunas

appartegnan a quella e mo 580 alla schlattina masculina. Ins comparegli cun quei las cefras de Mustér, nua che la claustra de paders e la scola de giuvens dattan in resultat cuntrari: 957 e 824. Sper igl institut cooperesch an a Glion alla germanisaziun il commerci e las scolas publicas e privatas, ellas qualas il Romontsch anfla mo pign risguard. Malgrad quels motivs han ils Romontschs il surmaun cun 795 encunter 604 (sin 1 466 habitants). Mo ils Tudestgs ein els davos diesch onns serefatgs pli fetg che ils nos, els ein carschi per 106, ils Romontschs mo per 42 olmas. Abstrahein nus de Glion, sche ei la populaziun della Foppa sesminuida, e zuar dapli ils Tudestgs (per 52) che ils Romontschs (per 29).

Ella *Lumnezia* dat la gronda enclava tudestga de *Val S. Pieder* la tempra al resultat. La populaziun ei en quei liug carschida per buca meins che 78 olmas, e quei spirontamein en favur dils Tudestgs, daferton ch' ils Romontschs, igl onn 1920 el pign diember de 10, ein ussa curdai mo sin 4. Il rest della *Lumnezia* ha sco la Foppa (deno Glion) pegliau digren, ils Tudestgs ein tschessai per 3, ils Romontschs per 28.

El *cumin de Trin* ei nossa crusch la visch-naunca de *Flem*. Ella porscha in interessantissim maletg dil moviment che la hotelleria ha mess a strada els centrums de cura: Sminuziun digl element indigen, carschament digl element jester, e cunquei era digren dil lungatg dil liug, dil Ro-

montsch. Ils resultats ein aschi tipics, ch' ei vala la breigia de reproducir differents detagls:

	1920	1930	Carschen Digren	
Populaziun domiciliada	866	977	111	—
Vischins dil liug	466	378		88
Grisch. d'auters loghens	307	356	49	
Svizzers nungrischuns	44	137	93	
Jasters	49	106	57	
Catolics	90	167	77	

Quellas cefras lain lignar ordavon, ch' ils Nunromontschs (Tudestgs, Talians ed auters) ston esser s' augmentai per 150 (Svizzers nungrischuns ed jasters), pli ina part dils 49 Grischuns d'auters loghens, daferton che ils Romontschs ston esser sesminui per 88, meins l'autra part dils 49 Grischuns d'auters loghens. Cun quella supposiziun concordan ils resultats della dumbraziun admirablamein.

	1920	1930	carschen digren
Romontschs	617	554	63
Nunromontschs	249	423	174
dals quals: Tudestgs	231	377	146

Aschi dolorus sco quels resultats sepresentan per scadin patriot romontsch, ina consolaziun porschan els. Quei ei, che la populaziun indigena, ils vischins sez dil liug ed ils domiciliai ord autras vischnauncas romontschas ein era tiella dumbraziun de 1930 buca senuspi de seddeclarar per Romontschs. Il profit, ch' ils Tudestgs han fatg; deriva quasi spirontamein dall'imigrazion.

Sch' ei stess mo buca mender en certas autras vischnauncas! Da patertgar dat ei denton, che numerus vischins han bandunau il liug ed ein ī a gudignar lur paun ordeifer, daferton che roschadas ord auters cantuns e tiaras jastras ein se-tratgs neutier ed emprovan lur fortuna a Flem.

Sche Flem porscha in exemplipic dil svilup modern, della compenetraziun de pievel de differenta derivonza, lingua e confessiun, sch' ei *Trin*, la vischnaunca la pli vischina e pli parentada cun Flem, igl exemplipic dil cuntrari, della stabilitad, gie perfin d' in fleivel regress. Sia populaziun ei sesminuida da 698 sin 661. Sco pli davegl, aschia tenta aunc oz quels de Trin la queida de serender naven, mirar giu la Svizzera ed il mund. Ils vischins ein sesminui aunc pli fetg che la populaziun totala, de 490 sin 443. Carschi ein mo ils burgheis d' auters cantuns, da 36 sin 69. Ei stuess suandar ordlunder, che era il diember dils Romontschs ei sesbassaus, e sco ei fuss de temer, pli fetg che ils Tudestgs ed auters. Mo en verdad dumbrava Trin igl onn 1920 Romontschs 568 e Tudestgs 124 e 1930 Romontschs 560 e Tudestgs 99. Pia ina sminuziun dils emprems per mo 8 e dils davos per 25. Quei resultat survarga tut frossas speronzas, e quei aschi fetg, che igl ei grev ded anflar ina explicaziun senza enconuscher las relaziuns localas. Ei quei forsa igl effect dil moviment romontsch actual, dellas stentas e premuras della Renania e

della Casa paterna? Ei sa buc esser auter, che tals, ils quals ein anno 1920 sedeclarai per Tudestgs, ni che tals, ils quals ein setratgs neutier ord contradas nunromontschas, han tier la dumbraziun de 1930 suttastrihau la quarta colonna de lungatg matern: quella dil Romontsch.

b) *La Sutselva.* Nus arrivein sil sulom grischun il pli exponiu alla germanisiziun, quel, dil qual in professer d'universitad, Sertorius, ha predetg avon zacons decennis, el vegni en in interval de 20—25 onns a plidar totalmein tudestg. Aunc ussa ei quella profezia buca severificada, schegie che bein enqual petga ha entschiet a balluccar, de maniera che il baghetg entir rauassa buca pli dapertut sin fundament solid. Ils quater cumins della Sutselva presentan ils suandonts resultats:

	1920	1930
<i>Populaziun</i>		
<i>Cumins</i>	<i>totala</i>	<i>romontscha</i>

	1920	1930
<i>Populaziun</i>		
<i>Cumins</i>	<i>totala</i>	<i>romontscha</i>
Razen	3 152	2 221
Tumliasca	2 587	1 201
Tusaün	3 647	797
Schons	1 533	1 068
	<hr/> 10 919	<hr/> 5 287
	<hr/> 11 088	<hr/> 4 952

Daferton che la populaziun totala ei carschida, schegie mo modestamein, en tutz quels cirquits, deno a Schons, nua ch' ella ei stada quasi stabila, ein ils Romontschs sesminui dapertut, senza excepziun, e quei ton en diember absolut sco proporzional.

	<i>Moviment della populaziun</i>	<i>Romontschs</i>	
<i>Cumins</i>	<i>totala</i>	<i>romontscha</i>	<i>sin 1000 habitants</i>
Razen	+ 40	— 95	1920      1930
Tumliasca	+ 109	— 64	705      666
Tusaun	+ 34	— 137	464      414
Schons	— 14	— 19	218      179
	<hr/>	<hr/>	<hr/>
	+ 169	— 335	696      691

El cumin *dil Plaun* sempo sulettamein la vischnaunca de *Bonaduz*, ch' il Romontsch ei tschessaus en proporziun cul Tudestg. Suenter che la dumbrazion de 1920, tenor la quala ils Romontschs eran duront ils diesch onns precedents buca mal serecvrai, de 230 sin 270 olmas, haveva giu dau nova speranza, ch' ins possi metter tiarms alla germanisaziun, ha la dumbrazion de 1930 procurau la pli crudeivla decepziun. Ils Romontschs ein puspei sbassai, e quei pli che mai, entochen sin 182 olmas daferton ch' ils Tudestgs ein carschi da 512 a 669. Ils emprems formavan anno 1920 aunc 34 % della populaziun e 1930 mo pli 21 %. La statistica demuossa, che ils Tudestgs s'augmentan buca mo sco a Flem tras imigraziun, sunder era denter ils vischins, ils quals ein duront quei interval passai da 480 sin 503. Igl ei buca de sefar illusius, la giuventetgna, che crescha si, ei tudestga, ed ils vegls, che plaidan sulets aunc romontsch, ein sin murir ora. Cheu encunter ein ils sforzs della Romania ed Uniun

romontscha dil Plaun, la premura de meriteivels e distingui vischins romontschs adumbatten.

Tut auter stat ei a *Domat*. Quei rempar dil pievel romontsch ballucca nuotzun, anzi la proporziun dils Romontschs ei s'alzada els davos diesch onns de 83 % sin 84 %. Domat ei cun 1 449 habitants, che plaidan nies lungatg, la visch-naunca, che dumbra ils pli bia Romontschs, suenter Mustér e Sumvitg. Sco Domat aschia resta era *Razen* fideivels a nossa viarva. Ils Romontschs ein leu s' augmentai per 14 ed ils Tudestgs per 12 olmas, la proporziun ei mo fleivlamein untgida en nossa disfavur, da 84 sin 83 %.

Pil cumin de *Tusaun* stuein nus Romontschs dir cul poet Dante: lasciate ogni speranza! En ina suletta denter las diesch vischnauncas havein nus aunc il surmaun, a *Prez*, ed era leu ein ils Tudestgs ina tiarza della populaziun, che sa semidar entochen 1940 tgunschamein el surpli. A *Sarn* e *Purtein*, nua che ils dus lungatgs tenevan 1920 aunc quasi la ballontscha, ein ils Romontschs gnanc pli ina tiarza.

En *Tumliasca* ha il Romontsch ragischs pli fermas silmeins oradem la vallada, sillas spundas suleglivas da maun dretg dil Rein, els treis vitgs de *Veulden*, *Sched* e *Traun*. En tut las otras vischnauncas eis el en digren. A Scharons ei la majoritad passada dals Romontschs als Tudestgs, ad Almens ein quels duas gadas pli numerus ch' ils nos, ed era Pasqual e Tumegl, nua che

nus havein aunc il surmaun, segermaniseschan pli e pli. Quellas fritgeivlas contradas, che formavan antruras ina ferma punt denter il Romontsch renan e quel dell' Albula e digl En, ein ussa mo pli in fleivel piogn, pusaus sin tschespet sballunont.

Ins comparegli ils resultats dellas suandon-tas vischnauncas:

	<i>Romontschs</i>		<i>Tudestgs</i>	
	1920	1930	1920	1930
Veulden	110	125	17	20
Sched	139	143	3	7
Traun	54	50	5	6
Pasqual	235	199	66	112
Tumegl	167	138	72	92
Scharons	218	197	190	242
Roten	60	58	73	86
Almen	97	78	120	156
Prez	166	150	52	75
Sarn	65	43	67	109
Purtein	18	9	24	28
Cazas	301	277	785	888

Realisada la germanisaziun els cumins de Tumliasca e Tusaun, daventa la *val de Schons* ina insla, in' enclava romontscha, confinida sin mintga vart da territori tudestg. Ad interim dumbra Schons aunc adina denter sias dudisch visch-nauncas mo ina suletta cun majoritad tudestga: *Rongellen*. Mo els dus loghens pli impurtonts della vallada, ad *Andeer* e *Ziraun*, ein ils Tudestgs en

progressiun, daferton che las vischnauncas pli pintgas: Maton (nua che tuts ils 56 habitants ein sedeclarai per Romontsch), Lohn, Donat, Pazen-Farden, Pignieu e las duas Ferreras mantegnan fideivlamein il vegl lungatg della tiara. Possien las stentas dils curaschus ed inflammai campiuns dil Romontsch, che han giu la trina en quella bellezia vallada, era dacheudenvi esser encorunadas da success!

c) *Surmir e Bergugn.* Ils quater cumins percurri dallas auas dell' Albula e Gelgia presentan las suandontas cefras statisticas:

<i>Cumins</i>	<i>Populaziun</i>		<i>Populaziun</i>	
	<i>totala</i>	<i>romontscha</i>	<i>totala</i>	<i>romontscha</i>
Alvaschein	1 742	1 241	2 159	1 347
Belfort	1 305	869	1 418	899
Sursès	2 250	2 053	2 204	2 015
Bergugn	1 235	505	1 211	433
	6532	4 668	6 992	4 694

Da quella tabella seresultescha sco carschen ni digren per ils singuls cumins:

<i>Cumins</i>	<i>Moviment della populaziun</i>		<i>Romontschs</i>	
	<i>totala</i>	<i>romontscha</i>	<i>sin 1000 habitants</i>	
Alvaschein	+ 417	+ 106	712	624
Belfort	+ 113	+ 30	666	634
Sursès	- 46	- 38	912	914
Bergugn	- 24	- 72	409	358
	+ 460	+ 26		

Ins vesa ordlunder, che la sminuziun dils Romontschs en diis dils cumins ei en cefra absoluta buc uera gronda e pli che compensada entras in' augmentaziun en ils dus auters cirquits. Mo bia mender sepresenta la caussa, sche nus considerein la proporziun denter Romontschs ed ils auters, la quala ei en treis dils cumins mala mein sesbassada en nossa disfavur. Mo a Sursès havein nus saviu salvar e perfin aunc renforzar nossa situaziun

Treis vischnauncas ord quei territori meretan speciala attenziun: Vaz-su, Bergugn e Bivio ni Stalla. Sigl intsches de *Vaz-su* ei dapi zacons decennis naschiu ina nova fracciun, differenta della glieud dil vegl vitg en lungatg ed occupaziun: il liug de cura de *Planiras* (Lenzerheide). Che quei liug ei en plein svilup, demuossan las cefras. 1920 haveva Vaz-su 965 ed ussa, 1930, buca meins che 1 337 habitants, in carschament de 372 ni de bunamein 40 % en mo diesch onns. Sentelli che quei carschament croda per la gronda part sin elements imigrai, cunzun Svizzers d' auters cantuns ed jasters. Quels han priu tier ensemble per 174, ils Grischuns d' outras vischnauncas per 71 ed ils vischins per 127. Igl ei buca grev de lignar, ch' ils Romontschs han profitau de meins ch' ils Tudestgs de quei svilup. Dalla augmentaziun de 372 olmas crodan sils emprems 74 e sils secunds 237, daferton che ils habitants de lungatg talian ein sedublegiai, 54 igl onn 1920

e 108 igl onn 1930. Ils Romontschs, 776 enviers 445 Tudestgs, formeschian mo pli 58 % della populaziun. Igl ei de temer, ch' els crodien els diesch proxims onns sut la mesadad.

*Bergugn*, schegie per ils jasters in favoreivel liug de transiziun denter la Bassa e l' Engiadina, para buca de suandar la medema lingia ascendenta sco Vaz-su. Sia populaziun ei perfin sminuida, da 710 a 653, e quella sminuziun pertucca (sper ils Taliens) spirontamein ils Romontschs.

Las cefras ein:

1920: Tudestgs 224, Taliens 54, Romontschs 430.

1930: „ 243, „ 63, „ 368.

Ils Romontschs piteschan era en quell' aria schi saluteivla malamein dil trer anavos, e quei per cuolpa lur e buca pervia d' imigraziun de glieud jastra, ei gie era il diember dils nunvischins sminuius duront il davos decenni. A Bergugn ein ils Romontschs strusch pli 57 %.

Ils Romontschs de *Bivio* ni *Stalla* ein da vegl enneu en combat buca culs Tudestgs, mobein culs Taliens, ils quals survegnan succuors tras l' imigraziun, buca ord l' Italia ni il Tessin, mobein ord las valladas grischunas, cunzun ord la vischinonta *Bergaglia*. 1920 havevan ils Romontschs il surmaun cun 66 encunter 50, 1930 ein ils Taliens, sco gia pli da vegl, vegni suren. Els dumbran 69 ed ils nos mo 61. *Bivio* ha sper 22 vischins 94 derivonts ord autras vischnauncas

dil cantun e 18 jasters. Quei explicescha a nus tut.

Sche nus havessen de dar notas allas outras vischnauncas dil territori dell' Albula e Gelgia, dessen nus bunas a tuttas quellas de Sursès, cunzun era alla capitala *Savognin*, ina fetg buna ad *Alvaschein*, nua ch' ils Tudestgs ein tschessai da 42 sin 29 ed ils Romontschs carschi da 135 sin 167, ed ina schliata nota a *Casti*, ina aunc mendra ad *Alvagni*. Ils Tudestgs ein leu gia quasi ina tiarza della populaziun.

*d) L' Engiadina e Mustair.* Nos confrars spegl En sesanflan aunc pli che nus de «tschella aua» en dira lutga per il lungatg matern, il qual els ston defender sin dubel frunt, buca mo encunter la progressonta germanisaziun, anzi era encunter l' imigraziun ord il sid, encunter il Talian.

Daferton che nus havein en Surselva e Surmir mo entgins, schegie impurtonts centrums, els quals nies adversari fetga pei, mo paucs loghens de cura de pli gronda muntada, sco Casa digl Uaul e Planiras de Lonsch, ei en l' Engiadina la hotelleria secasada en quasi mintga vischnaunca e sedumbran pliras de quellas denter ils pli renomai e frequentai centrums de jasters ell' Europa. Il prighel, ch' il plaid romontsch vegni stenschen-taus, ei perquei negliu pli gronds ed ei fuss buca bia de sperar, sche nos confrars ladins fussen buca pli che nus auters loschs sin lur atgnadad

nazionala, premurai de mantener e cultivar «la dultscha lingua della mamma». Ins studegi mo in tec las cefras della statistica. L' Engiadina aulta dumbra sin 10 511 habitants, 5 075 Grischuns, 2 673 Svizzers ord auters cantuns e 2 763 jasters. Ils Grischuns formeschan pia ina minoritad, e dentier quels ein biars oriunds ord contradas tudestgas dil cantun. Ils vischins ein en las vischnauncas dell' Engiadina aulta fetg pauc numerus. A Bever e Samada vegn in vischin sin 17, a Schlarigna e Puntraschigna sin 8, a Segl e Silvaplana sin circa 10, a S. Murezi sin 38 habitants. S. Murezi dumbra mo 115 vischins sper 1 293 Grischuns ord autras vischnauncas, 1 192 Svizzers d' auters cantuns e 1 368 jasters ord autras tiaras. In sto cheu bunamein sesmarvegliar, ch' il Romontsch arriva aunc ell' Engiadina aulta sin 3 514, a S. Murezi sin 709 olmas. En l' Engiadina aulta sco bassa vegn senza dubi bein enqualin ad esser sedeclearaus per Romontschs, il qual ha sia patria ordeifer nies cantun. En emprema lingia vegn ei ad esser affons de mummas romontschas, mariadas cun Svizzers d' auters cantuns ni jasters. Ei dat perfin vischnauncas, nua ch' il diember dils Romontschs survarga quel dils Grischuns (vischins dil liug e d' auters loghens) ni ei quasi aduals.

	Grischuns	Romontschs
Sent	687	703
Scuol	897	876

Fetan	401	411
Zernez	574	563
Lavin	188	192
Guarda	229	237
Tschlin	540	537

Quellas cefras demuossan claramein, ch' ils nativs Romontschs han aunc adina la forza buca mo de semantener, anzi era de s' assimilar domiciliai d' auters cantuns. Quei vala perfin per in diember vischnauncas d' Engiadina aulta, sco Zuoz, S-chanf, Samada, Ponte, Madulein etc.

Cumpegliond era la Val Mustair en quei territori, obtenin nus ils resultats suandonts:

	1920	1930	
	<i>Populaziun</i>	<i>Populaziun</i>	
	<i>totala romontscha</i>	<i>totala romontscha</i>	
Engiadina aulta	7 885	3 226	10 511
Engiadina bassa	6 840	5 179	6 663
Val Mustair	1 575	1 261	1 554
	16 300	9 666	18 728
			9 768

Ils Nunromontschs ein buca tuts Tudestgs, sunder serepartan denter quels ed ils Taliens, sper ils quals vegn aunc in diember, che plaidan auters lungatgs. L' Engiadina aulta dumbra 4 510 Tudestgs e 2 212 Taliens, l' Engiadina bassa 1 256 e 399, Mustair 220 e 36.

Ariguard carschen e digren duront il decenni 1920 e 1930 sepresenta a nus il suandon maletg:

*Moviment della populaziun*

	<i>totala</i>	<i>romontscha</i>	<i>Romontschs sin 1000 habitants</i>	
			1920	1930
Engiad. aulta +	2 626	+ 288	409	334
Engiad.bassa —	177	— 198	757	747
Val Mustair —	21	+ 12	800	819
	<hr/>	<hr/>		
	+ 2 428	+ 102		

En la *Val Mustair* havein nus il medem fenomen, sco nus havein entupau en ils auters cumins de compacta populaziun romontscha: La Cadi, Rueun, Surmir, quei ei, che quella ei daventada aunc pli romontscha che vidavon. Il pli favoreivel resultat porscha la vischnaunca de S. Maria. Cura che nus mavan aunc a scola primara, vegneva ei mussau, che la *Val Mustair* hagi mo ina vischnaunca cun majoritad catolica: la capitala *Mustair* sez, e mo ina vischnaunca cun majoritad tudestga: S. Maria. Ed ussa representan era cheu ils Romontschs pli che las duas tiarzas della populaziun. Els davos diesch onns ein els semuplicai da 67 % sin 71 %.

Mo quels progress parzials ell' allontanada *Val Mustair* ein buc el cass ded ulivar ora la perdita en l' impurtonta Engiadina aulta, nua che quater vischnauncas han duront ils davos diesch onns calau ded esser en majoritad romontschas, numnadamein: Madulein, Segl, Silvaplana e Zuoz, e nua che nus havein ussa il surpli sulettamein a Ponte-Campovasto e S-chanf.

## 5. Ils differents dialects.

Igl ei buca pusseivel de zavrar exactamein la populaziun romontscha tenor ils dialects, els quals nies lungatg sedivida. *Primo* ein gie il diember ed ils tiarms de quels dialects sez buca stabili definitivamein. Sche nus secuntentein de distinguer mo las specias principales dil Romontsch, che ein: il Sursilvan, il Sutsilvan, il de Surmir ed igl Engiadines, sche stuein nus far la reserva, che ei dat pliras fuormas intermedias, quei ei talas, che han in ton de l'in ed in ton de l'au-ter dialect. Quei vala per exempl per la tschontscha de Flem e Trin, che nus attribuin al Sur-silvan, per quella dil Plaun, che nus quintein tier il Sutsilvan, per quella dil cumin de Bergugn, che ei ual schi parentada cugl Engiadines sco cun igl idiom de Surmir.

*Secundo* enconuscha la statistica federala naturalmein mo il lungatg romontsch en general e subdivida buca quel en differents dialects. Ina zavrada sa perquei mo daventar en tala maniera, che l'entira populaziun romontscha d'ina visch-naunca vegn attribuida al dialect, che predominescha en quella. Aschia stuein nus dumbrar tuts ils Romontschs de S. Murezi ni Scuol sco plidond igl idiom Engiadines, tuts ils Romontschs a Tusaun sco Sutsilvans, quels a Flem sco Sursil-vans e tut quels sillars Planiras de Lonsch sco de Surmir. Finalmein essan nus per il medem motiv

sfurzai de restrenscher la divisiu en dialects sil territori romontsch, essend nunpusseivel de spar-ter tenor origin ils Romontschs imigrai en loghens tudestgs, sco a Cuera, Arosa, Tavau.

Applicond quels principis arrivein nus per il territori romontsch tier ils resultats che suondan:

<i>Dialects</i>	<i>Populaziun</i>		<i>Moviment</i>
	<i>1920</i>	<i>1930</i>	
Sursilvan	16 292	16 601	+ 309
Sutsilvan de Surmir	5 287 4 163	4 952 4 261	- 335 + 98
Engiadines	10 171	10 201	+ 30
Total	35 913	36 015	+ 102

Ils treis emprems dialects en questa tabella appartegnan pli stretgamein ensemble en quei senn, che els constituteschan per opposiziun al Ladin ni lungatg d' Engiadina il Romontsch renan, numnaus dals erudits era semplamein mo il Romontsch, ni da nos confrars sper igl En il Tschallauer, quei ei quel de tschella aua. Las duas gruppas sepresentan cullas cefras suandontas:

<i>Gruppa</i>	<i>Populaziun</i>		<i>Moviment</i>
	<i>1920</i>	<i>1930</i>	
Romontsch renan	25 742	25 814	+ 72
Ladin	10 171	10 201	+ 30
Total	35 913	36 015	+ 102

Igl ei de preveder che quels de Surmir se-dostien de vegnir semplamein ralliai alla gruppaa

renana e reclomien lur independenza, la quala els fan era valer en scola e baselgia.

Seconformond a lur reclamaziun obtenin nus las treis gruppas conformas als treis lungatgs de scartira:

<i>Gruppa</i>	<i>Populaziun</i>		<i>Moviment</i>	
	<i>1920</i>	<i>1930</i>		
Sur- e Sutsilvan	21 579	21 553	—	24
de Surmir	4 163	4 261	+	98
Ladin	10 171	10 201	+	30
Total	35 913	36 015	+	102

Ella gruppa engiadinesa havein nus era compigliau ils dialects de Val Mustair e Bergugn, plinavon havein nus buca distingiu denter las duas specias d' Engiadines: il Putèr ni idiom della Engiadina aulta ed il Vallader ni idiom dell' Engiadina bassa. Quella gruppa selai pia divider en ils quater roms che suondan:

<i>Dialect</i>	<i>Populaziun</i>		<i>Moviment</i>	
	<i>1920</i>	<i>1930</i>		
Putèr	3 226	3 514	+	288
Vallader	5 179	4 981	—	198
de Bergugn	505	433	—	72
de Mustair	1 261	1 273	+	12
	10 171	10 201	+	30

Nus resumtein cuortamein: La billanza dils differents dialects per il decenni 1920 e 1930 presenta ils suandonts resultats, quintai mintgamai sin melli olmas. *Gudogn*: Mustair 10, Sursilvan

19, Surmir 21, Putèr 90; *Perdita*: Vallader 38, Sutsilvan 63, Bergugn 142.

## 6. Las duas confessiuns.

En las publicaziuns officialas sur las dumbraziuns dil pievel svizzer ein ils differents lungatgs buca zavrai ora tenor confessiuns. Tuttina han ins gia tier dumbraziuns precedentas empruau de stabilir, cons Romontschs seigien de messa e cons de priedi. Quei ei daventau tenor la suandonta metoda. Las biaras vischnauncas el territori romontsch e perfin enqual cumin apparteignan compactamein u a l' ina u a l' altra confes- siun. Ins ha cheu dumbrau l'entira populaziun romontscha dil liug tier lezza. Ils Romontschs en las vischnauncas pariteticas han ins repartiu den- ter las duas confessiuns u ulivamein, per mesa- dads, ni proporzionadamein al diember total dils habitants de l' ina e l' altra. Quei deno els lo- ghens, nua che la populaziun romontscha appar- tegn cun gronda preponderonza ad ina confessiun determinada. Aschia han ins quintau tuts ils Ro- montschs en Engiadina (deno a Tarasp) per pro- testants. Ils Romontschs, che habiteschan la part tudestga ni taliana dil cantun, han ins attribuiu allas duas confessiuns tenor la medema propor- ziun, sco ella fuva seresultada per il territori ro- montsch. Igl ei evident, che ina tala metoda sa- veva buca porscher cefras exactas, sunder mo in resultat approximativ, ed ins haveva il senti-

ment, che il quen vegni cheutras arrondius pli-tost en favur della confessiun protestanta. Seba-sond sils principis discrets sisura havevel jeu en mia lavur sur la dumbraziun de 1920 giu taxau per il cantun entir il diember dils Romontschs catolics sin 22 900 e quel dils protestants sin 16 100. Tenor la medema metoda arrivass jeu per 1930 sin 23 074 catolics e 15 954 protestants.

Per quella davosa dumbraziun hai jeu den-ton il plascher de saver indicar las cefras exactas offffcialas, schegie che ellas ein aunc buca publi-cadas. Sin mia supplica ha il bureau statistic federal, al qual jeu engraziel cheu grondamein, giu la buontad de far la repartiziun dils Ro-montschs el cantun Grischun denter las differen-tas confessiuns, e quei sin basis dellas cartas officialas della dumbraziun. Il resultat, che ei ve-gnius indicaus a mi secloma: protestants 14 791, catolics 24 172, auters 65, denter quels dus ge-dius, totalmein 39 028 Romontschs en nies can-tun. Sin 1000 Romontschs vegnan aschia 379 protestants, 619 catolics e 2 auters.

## 7. Ordeifer il territori romontsch.

Schegie che il diember dils Romontschs se-casai ordeifer las vals e vischnauncas dil terri-tori, nua che nies lungatg predominescha, ei buca decisivs per siu manteniment, carschen u digren, sche eis el tuttina buca senza interess e gida sil-meins in ton ad explicar las sperditas, che nus

havein fatg ell' atgna tiara. Nus stuein cheu distinguer ils Romontschs ella part tudestga e taliana dil Grischun ed ils Romontschs ella Svizzena ordado nies cantun.

a) *Ils Romontschs el Grischun tudestg e talian.* Lur diember ei de 3 214 ella dumbraziun de 1920 e de 3 013 en quella de 1930, danunder ch' ei resulta ina sminuziun de 201. Nus savein allegar mo ils loghens, nua che ils Romontschs survargan u survargavan il diember de 100. Igl ei quei:

	1920	1930
Cuera	1 871	1 681
Tavau	430	430
Arosa	123	189
Igis	83	100
Küblis	132	30

Quellas cefras demuossan gia, che la sminuziun indicada sisura deriva per part de cheu, che Romontschs, ils quals setenevan si en in liug per ils motivs transitorics de gudogn e lavur (mira Küblis!) ein puspei setratgs naven, per part era de cheu, che la nova generaziun, ils descendants de Romontschs secasai definitivamein, han piars lur caracter, ein seschais germanisar. En quei risguard desolescha nus principalmein il resultat dil marcau de Cuera.

b) *Ils Romontschs ella Svizzera ordado il Grischun.* La populaziun romontscha dell' entira Svizzena, compriu il Grischun, muntava igl onn 1920 tenor la statistica officiala sin 42 940 olmas. Cor-

regend l' errur ariguard Schnaus arrivein nus effec-  
tivamein sin 43 038. La dumbraziun de 1930 dat il  
diember de 44 158. Malgrad la sminuziun el Gri-  
schun essan nus pia ella Svizzera entira carschi  
per 1 120 olmas, quei ei per 26 per melli, daferton  
che l' augmentaziun dil pievel total ei 47 per  
melli. Essend che la populaziun franzosa e ta-  
liana ei s' augmentada relativamein aunc meins  
che la romontscha, havein nus saviu mantener  
la proporziun ded 11 per melli, la quala vegr-  
tier a nus naven dils 1910. Ils Taliens ein els  
davos diesch onns curdai da 61 sin 60 ed ils  
Franzos da 213 sin 204, daferton ch' igl element  
tudestg ei carschius de 709 sin 719 per melli  
della populaziun residenta en Svizzera.

Il diember dils Romontschs ordeifer il can-  
tun Grischun ei carschius extraordinariamein den-  
ter las duas davosas dumbraziuns; 3 911 igl onn  
1920, e buca meins che 5 130 igl onn 1930, pia  
in' augmentaziun de 1 219 ni de 31 per tschien,  
quasi per ina tiarza. Igli ei evident che mo la  
pintga part de quella augmentaziun sa vegrir at-  
tribuida al surpli dellas naschientschas sur ils  
mortoris, lunschora la pli gronda part vegrir a de-  
rivar dall' emigraziun de Romontschs ord lur can-  
tun nativ. Sin fundament dellas cefras statisticas  
ariguard il diember de naschientschas e mortoris  
els davos diesch onns selai concluder, che il  
diember dils Romontschs, che han bandunau il  
Grischun per prender residenza en auters can-

tuns, ei silmeins per 1 000 olmas pli gronds che il diember dils Romontschs, che ein returnai da leu a casa. Quei factum explichescha a nus per gronda part, pertgei che la populaziun romontscha ei sesminuida el cantun Grischun. Il mussament füss aunc pli clars, sche nus savessen, cons Romontschs han bandunau buca mo il Grischun, sunder era la patria svizzera. Ils Romontschs van egl jester ed en lur stagl imigrescha glieud d'auter lungatg en nies cantun.

Ei porscha in ton interess de mirar, en tgei cantuns e marcaus ordeifer il Grischun ei dat il pli bia Romontschs. Pli che 100 habitants de nies lungatg dumbravan igl onn 1930 ils cantuns:

Turitg	1 716	Lucern	203
S. Gagl	610	Aargau	207
Bern	330	Thurgau	148
Tessin	264	Glaruna	126
Vad	252	Sviz	120
Basel-marcau	235	Neuchatel	105
Genevra	215		

E denter ils marcaus han pli che 100 Romontschs.

Turitg	1 082	Bern	137
Basel	235	Winterthur	131
Genevra	186	Lucern	118
S. Gagl	180		

## 8. Entginas remarcabladads.

Eis ei buca gia remarcabel, ch' ei dat dentier ils Romontschs el Grischun, sco la statistica officiala relevesch, *dus gedijs*. Tgi sa danunder quels derivan? Ei selai quei explicar sin pliras manieras. Forsa che ei retracta de persunas de religiun e razza gediua, che ein secasadas en in liug romontsch ed han empriu quei lungatg, il qual els considereschan ussa perfin per lur lungatg matern. Pli probabel savess ei aunc retractar de descendants d' ina tala persuna gediua, ils quals ein naschi tier nus ed han empriu il Romontsch de giuven ensi. Remarcabel eis ei era, che 63 auters Romontschs appartegnan ni alla confessiun protestanta ni catolica. Mo quei ei buca mo ils sulets resultats curios, che la dumbrazion dil pievel manifestescha. Aunc sin dus puncts interessants vi jeu far attents:

a) Nus vesein quasi dapertut, che las persunas della biala schlattaina ein pli numerosas che quellas dell' autra. Aschia vegneva ei igl onn 1930 en Svizzera sin 1 000 persunas masculinas 1 076 femininas. Mo en quater cantuns han ils umens il surpli, ad Uri, Unterwalden Sura e Sut igl Uaul, Friburg e Valleis, tut cantuns cun pli gronda emigrazion che imigrazion. Forsa che igl ei cheu pli bia femnas che umens, che han bandunau lur cantun. El Grischun ei la proporziun 1 055 femnas per 1 000 umens. Tier ils habitants

de nies cantun de lungatg tudestg e talian vala la regla dil surpli della schlatteina feminina, daferton ch' igl ei tier ils Romontschs il *cuntrari*. 19 740 Romontschs appartegnan alla schlatteina masculina e mo 19 288 alla feminina, l' emprema ei pia suren per 452 persunas. Sin 1 000 umens vegn ei mo 977 femnas. Sche nus quintein mo la populaziun romontscha, ch' ei sedeclarada de nazionalitat svizzera e fagein abstracziun dils Romontschs jasters, sche ei la differenza aunc pli gronda, 19 482 encunter 18 926, ni in surpli de 556 persunas pella schlatteina masculina, ina proporziun de 1 000 per 971.

Igl ei buca lev de stabilir, danunder che quella untgida della regla deriva tiels Romontschs. Ins savess patertgar vidlunder, che ei detti denter quels, che bandunan il cantun, pli bia persunas della schlatteina feminina che masculina. Nus savein quei controlar mo per ils Romontschs emigrati ord nies cantun en auters cantuns della Svizzera; per quels, che ein i en tiaras jastras, mauncan las cefras. En verdad dat ei denter ils Romontschs domiciliai en auters cantuns dapli femnas che umens. Mo la differenza ei minima: 2 581 encunter 2 549, pia mo 32 persunas dapli de schlatteina feminina. Dils Romontschs en tut la Svizzera appartegnan 22 289 alla schlatteina masculina enviers 21 869 alla feminina, pia aunc adina ina differenza de 420, ni ina proporziun de 1 000 sin 981. L' emigraziun els auters cantuns

svizzers po aschia buca explicar, pertgei che la schlatteina masculina survarga en diember la feminina tier ils Romontschs el Grischun. Perencunter savess quei remarcabel factum derivar per part silmeins de cheu, che las femnas d' origin romontsch passan pli tgunsch ad in auter lungatg che ils umens, en special, che tier las lètgs mischedadas de lungatg la part romontscha ha pli bia resistenza, sche ella ei igl um, che sche ella ei la dunna. Ni meglier exprimiu, igl ei il bia igl um, che emplenesccha las cartas de dumbraziuns. Igl um romontsch para cheu de bein sedeclarar sez de siu lungatg, mo d' inscriver sia dunna tudestga u taliana sco tala, daferton ch'igl um buca romontsch po haver la tendenza d' assimilar sia dunna romontscha, de buca risguardar gl' origin e liug nativ de quella.

Els differents districts dil territori romontsch sezeivra la populaziun tenor schlatteina sco suonda:

	<i>Tudestgs</i>	<i>Romontschs</i>
	<i>Schlatteina</i>	<i>Schlatteina</i>
	<i>masculina</i>	<i>feminina</i>
Albula	898	1 055
Glogn	1 434	1 774
Muntogna	2 399	2 536
Rein posteriur	627	633
Plaun	1 289	1 480
En	608	648
Maloia	2 203	2 424
Mustair	94	126
Rein anteriur	157	115
	2 362	2 332
	4 312	4 059
	903	886
	545	547
	1 643	1 676
	2 452	2 529
	1 821	1 766
	605	668
	3 668	3 369

La differenza denter Tudestgs e Romontschs ariguard la schlatteina ei fetg frappanta en la pli gronda part dils districts, cunzun en quels dell' Albula, dil Glogn, de Muntogna e Maloia. Il pli ferm surpli della schlatteina masculina ha-vein nus el district, nua che ils Tudestgs vegnan quasi buc en consideraziun, en quel dil Rein anteriur ni ella Cadi. La differenza ei leu de 299 olmas e la proporziun 1 000 sin 918.

Dil rest stuein nus aunc remarcar, che quei seigi buca adina stau aschia tier ils Romontschs. Tier la dumbraziun de 1910 serepartevan quels en Svizzera sin 19 547 de schlatteina masculina e 20 575 de schlatteina feminina. Pil Grischun fuvan las cefras 18 230 e 19 320. Tiella dumbraziun de 1920 fuva il surpli dellas femnas aunc buc ulivaus ora dil tut. El Grischun dumbrava ins lu 19 489 Romontschs e 19 540 Romontschas.

b) Ins cartess, che tuts ils Romontschs fus-sien de *nazionalidad swizza*. Quei ei denton buc il cass. Ella dumbraziun de 1930 figureschan per il Grischun 620 Romontschs sco jasters<sup>1)</sup> e pella Svizzera entira aunc 166 depli, pia en tut 786.

<sup>1)</sup> Quella cefra anflein nus ella publicaziun officiala sur la dumbraziun federala: «Statistische Quellenwerke der Schweiz, Heft 57, Bern 1934». La revista edida medemamein dagl Uffeci de statistica federala: «Statistisches Jahrbuch der Schweiz, 1933», pagina 29, dat 666 Romontschs jasters el Grischun. El arriva perquei sin 39 074 Romontschs pil Grischun e 44 204 per la Svizzera, mintgamai tier 46 dapli che quei che seresulta ord la publicaziun officiala definitiva

Igl onn 1920 fuva ei 734 en nies cantun persul. Ei po quei esser per ina part glieud ord autras tiaras, che ei secasada da ditg enneu en contradas romontschas e ha brattau lur lungatg encunter il nies. Per l'autra part po ei esser femnas romontschas maridadas en nossa tiara cun umens jasters, las qualas han sezzas salvau lur caracter nazional e beinenquala perfin tratg lur affons en nies lungatg. Il lungatg-mumma compara per tals en il pli veritabel senn dil plaid. Quell' explicaziun vegn confirmada dal factum, che de quels «Romontschs jasters» el Grischun 362 apparteignan alla schlattina feminina e mo 258 alla masculina. Senza dubi han jasters, ils quals sequantan e sesentan Romontschs prestau en la megliera maniera il mussament, che els seigien vengonz de vegnir naturalisai svizzers.

### 9. Conclusiun.

Recapitulond en paucs plaids quei ch' ei vegniu exponiu en questa lavur e quei, che las tabellas tschentadas alla fin reveleschan, arrivein nus tier ils suandonts resultats arriguard carschen u digren dil lungatg romontsch duront il decenni 1920 e 1930:

- Nies lungatg ei semantenius, per part perfin s'enfirmius, en las contradas de populaziun compacta romontscha: ell' entira Surselva, cun la suletta excepziun della vischnaunca de Flem, els

cumins de Schons, Sursès e Mustair, el cumin de Razen deno a Bonaduz, en l' Engiadina bassa; el ei carschius en cefra absoluta, mo ha piars en cefra proporzionala ell' Engiadina aulta; el ei tschessaus mo modestamein en ils cumins de Sutsès, pli fetg en quels de Tusaun, Tumliasca e Bergugn.

b) Dallas 221 vischnauncas grischunas havevan igl onn 1920 cerca la mesadad, 107 ina majoritad romontscha, 1930 fuva ei aunc 101. Nus havein aschia piars il surpli en 6 vischnauncas, a Scharons, Stalla, Madulein, Segl, Silvaplana e Zuoz. En las treis davosas han ils Romontschs denton aunc adina la majoritad relativa, els ein pli numerus che ils Tudestgs u Taliens pri dapersei (il medem ei era aunc il cass a Bever e Schlarigna, nua che quels d' auter lungatg ensemes surpassan ils nos). Dallas 107 vischnauncas, ellas qualas ils Romontschs havevan il surmaun igl onn 1920, eis ei 39, nua che els ein carschi proporzionalmein, 21, nua che els ein semanteni sil medem scalem, e 47, nua che els ein sesminui.

Tuts ils avdants plaidan romontsch ellas duas pintgas vischnauncas de Pigniu en Surselva e Maton en Schons. Gnanc 1 % fan quels d' auters lungatgs ad Andiast. 99 % ein Romontschs a Medel, Schlans, Tujetsch, Siat, Falera, Riein, Lumbrein, Morissen, Surcasti, Tersnaus e Sur; 98 % a Ruschein, Cumbel, Vignogn e Vella; 97 %

a Breil, Sumvitg, Rueun, Ladir, Camuns, Uors-Lumnezia, Riom e Salouf; 96 % a Luven, Degen, Surcuolm, Stierva, Rona e Tinizun; 95 % a Flond, Sched, Casti-Wergenstein, Mulins, Parsons, Lü-Lüsai; 94 % a Trun, Mon, Cunter, Marmorera, Cierf, Fuldera; 93 % a Sagogn, Duin, Lohn, Pazen, Farden, Lontsch, Ramuosch; 92 % a Vuorz e Peiden; 91 % a Mustér, Pitasch, Donat, Guarda; 90 % a Lags e Sent. Quellas 59 vischnauncas astgein nus considerar sco spir romontschas. Pli che la mesadad ded ellas, 34, crodan sin la Surselva, 1 silla Sutselva, 6 sin la Val Schons, 12 sin Surmir, 3 sin l' Engiadina e 3 silla Val Mustair.

Ei dat 39 cumins u cirquits el Grischun; la majoritad dil pievel ei tudestga en 15, romontsch en 18 e taliana en 6. Ei dat 14 districts, 6 cun majoritad tudestga, 6 cun romontsch e 2 cun taliana. Quellas cefras demuossan, che il Romontsch ha aunc tschespet avunda, in diember sufficient de cuminonzas publicas, nua che el savess far valer ses dretgs sco lungatg official, sche ses affons fussen tuts penetrai dals sentiments, che els duein a lur car lungatg mumma.

Concludend stuein nus dir, che la dumbrazion de 1930 hagi buca spargnau als Romontschs enqual decepziun, schegie che quei fuva de sminar e temer: nossa viarva untgescha ad in untgir en Sutselva, Tumliasca e Bergugn, e quei buca ton pervia dell' imigraziun tudestga, sco per-

quei ch' ella vegn «maltractada dals affons e bandunada». Naturalmein ei sia situaziun era greva leu, nua che las bellezias della natira ed il confort scaffius dals carstgauns carmala neutier roschadas jasters, ils ins per guder ed ils auters per survir, ell' Engiadina ed a Flem; mo ual leu stuein nus admirar la resistenza stinada dils affons della tiara, ils quals paran ded appreziar e carezar ses scazis culturals ton pli, ch' els ein en prighel. Semantenius e tscheu e leu perfin progressaus ei nies lungatg ellas contradas compactamein romontschas: la Surselva e Sursès, las vals de Schons e Mustair. Malgrad quella vart legreivla, ei la dumbraziun de 1930 per nus in serius advertiment, de buca terglinar, anzi de luvrar e sestentar, vulein nus che era quellas petgas entscheivien buc a balluccar, mobein resistien aunc victoriusamein per decennis e tschentaners.

\* \* \*

\* \* \*

\*

## Territorí grischun romontsch

Populaziun residenta e romontscha 1930

Part procentuala d. populaziun romontscha 1920 e 1930

Cumins e vischnauncas	1930		% Romontschs	
	Populaziun	Romontschs	1920	1930
<b>La Cadi</b>				
Breil	1 066	1 030	95	97
Medel	616	610	100	99
Mustér	1 781	1 620	91	91
Schlans	185	182	99	99
Sumvitg	1 538	1 494	97	97
Trun	1 263	1 192	93	94
Tujetsch	920	909	97	99
<b>Rueun</b>	2 207	1 591	71	72
Andiast	344	343	100	100
Pigniu	77	77	100	100
Rueun	459	444	95	97
Siat	235	233	99	99
Sursaissa	701	136	21	19
Vuorz	391	358	90	92
<b>La Foppa</b>	5 778	4 020	70	70
Castrisch	375	306	86	82
Falera	298	294	98	99
Flond	174	165	98	95
Glion	1 466	795	57	54
Lags	274	246	91	90
Ladir	145	140	98	97
Luven	264	253	98	96
Pitasch	117	107	88	91
Riein	120	119	100	99
Ruschein	361	354	96	98
Sagogn	428	397	94	93

Cumins e vischnauncas	1930		% Romontschs	
	Populaziun	Romontschs	1920	1930
Schluein	593	470	81	79
Schnaus	128	95	84	74
Sevgein	215	191	87	89
Strada	45	26	65	58
Valendau	437	45	5	10
Versomi	338	17	8	5
<b>Lumnezia</b>	<b>3 756</b>	<b>2 760</b>	<b>75</b>	<b>74</b>
Camuns	92	89	97	97
Cumbel	304	299	90	98
Degen	258	249	100	96
Duin	108	100	98	93
Lumbrein	475	470	99	99
Morissen	191	190	100	99
Peiden	117	108	99	92
S. Martin	91	13	14	14
Surcasti	163	161	96	99
Surcuolm	86	83	98	96
Tersnaus	96	95	97	99
Uors	70	68	85	97
Val	864	4	1	—
Vignogn	151	148	95	98
Vella	338	333	99	98
Vrin	352	350	100	99
<b>Trin</b>	<b>2 982</b>	<b>1193</b>	<b>43</b>	<b>40</b>
Favugn	726	23	3	3
Flem	977	554	71	57
Trin	661	560	81	85
Tumein	618	56		9
<b>Razen</b>	<b>3 192</b>	<b>2 126</b>	<b>70</b>	<b>67</b>
Bonaduz	864	182	34	21

Cumins e vischnauncas	1930		% Romontsch-	
	Populaziun	Romontschs	1920	1930
Domat	1 729	1 449	83	84
Razen	599	495	84	83
<b>Tumliasca</b>	<b>2 696</b>	<b>1 117</b>	<b>46</b>	<b>41</b>
Almen	238	78	44	33
Fürstenau	200	15	19	7
Giuvaulta	159	46	27	29
Pasqual	314	199	77	63
Pratval	86	8	31	9
Roten	146	58	43	40
Scharons	444	197	53	44
Sched	151	143	89	95
Seglias	524	60	5	11
Tumegl	233	138	66	59
Traun	56	50	91	89
Veulden	145	125	86	86
<b>Tusaun</b>	<b>3 681</b>	<b>660</b>	<b>22</b>	<b>18</b>
Cazas	1 221	277	26	23
Flerden	140	28	29	20
Masein	206	5	5	2
Purtein	37	9	43	24
Prez	226	150	76	66
Sarn	152	43	48	28
Tartar	174	14	14	8
Tusaun	1 278	129	12	10
Tschappina	167	2	2	1
Urmein	80	3	8	4
<b>Schons</b>	<b>1 519</b>	<b>1 049</b>	<b>70</b>	<b>69</b>
Andeer	539	295	59	55
Casti-Wer- genstein	40	38	95	95

Cumins e vischnauncas	1930		% Romontschs	
	Populaziun	Romontschs	1920	1930
Clugin	39	22	84	56
Donat	141	129	82	91
Ferrera dado	77	63	88	82
Ferrera dadens	42	37	94	88
Lohn	68	63	97	93
Maton	56	56	98	100
Pazen-Farden	77	72	76	93
Pignieu	113	99	87	88
Rongellen	67	7	4	10
Ziraun	260	168	75	65
<b>Alvaschein</b>	<b>2 159</b>	<b>1 347</b>	<b>71</b>	<b>62</b>
Alvaschein	208	167	75	80
Casti	238	154	71	65
Mon	110	104	95	94
Mutten	122	7	10	5
Stierva	144	139	91	96
Vaz-su	1 337	776	73	58
<b>Belfort</b>	<b>1 418</b>	<b>899</b>	<b>67</b>	<b>63</b>
Alvagni	440	283	72	64
Brinzeuls	175	143	94	82
Ferrera	267	13	5	5
Lontsch	337	315	94	93
Surava	198	145	71	78
<b>Bergugn</b>	<b>1 211</b>	<b>433</b>	<b>41</b>	<b>36</b>
Bergugn	653	368	60	57
Filisur	367	53	17	14
Wiesen (Tein)	191	12	6	6
<b>Surses</b>	<b>2 204</b>	<b>2 015</b>	<b>91</b>	<b>91</b>
Cunter	144	136	93	94

Cumins e vischnauncas	1930		% Romontschs	
	Populaziun	Romontschs	1920	1930
Marmorera	95	89	94	94
Mulins	99	94	95	95
Parsons	131	125	97	95
Riom	208	202	92	97
Rona	99	95	95	96
Salouf	260	253	91	97
Savognin	516	459	89	89
Stalla	135	61	54	45
Sur	141	140	99	99
Tinizun	376	361	97	96
<b>Engiadina</b>				
<b>aulta</b>	10 511	3 514	41	33
Bever	254	119	49	47
Madulein	97	40	54	41
Ponte Campovalto	285	189	66	66
Puntraschigna	984	252	28	26
Samada	1 783	694	42	33
S-chanf	512	396	76	77
Schlarigna	889	333	46	37
Segl	359	167	62	47
S. Murezi	3 968	709	24	18
Silvaplana	411	197	58	48
Zuoz	968	418	55	43
<b>Ramuosch</b>				
Tschlin	648	537	85	83
Ramuosch	527	488	92	93
Samagnun	394	1	—	—

Cumins e vischnauncas	1930		% Romontschs	
	Populaziun	Romontschs	1920	1930
<b>Surtasna</b>	2 415	1 965	81	81
Ardez	627	497	79	79
Guarda	261	237	92	91
Lavin	216	192	84	89
Susch	257	211	80	82
Tarasp	326	265	88	81
Zernez	728	563	77	78
<b>Suttasna</b>	2 679	1 990	75	74
Fetan	534	411	72	77
Scuol	1 363	876	65	64
Sent	782	703	93	90
<b>Val Mustair</b>	1 554	1 273	80	82
Cierf	126	119	92	94
Fuldeva	94	88	79	94
Lü-Lüsai	57	54	89	95
Mustair	656	587	89	88
S. Maria	407	289	67	71
Valcava	214	135	69	63

